



Prolog Fasnachtsplakette 2017

Motto: „S'Röhreschuelhus als Chlättergarte“

S'neue Schuelhus uf em Gartehof
Isch ä Tummelplatz für jede Goof
Ä moderne Bau, was will me meh
Z' Allschwil hesch no nüt so gseh

Ä Mosaikstei sig dä Schuelhusbau
Ganz neuu Akzänt stellt d'Gemeind zur Schau
Dr ganzi Schuelsport chame neu beläbe
Mit witere Sportagebot, das isch s'Besträbe

Denn die Röhrefassade – die isch wundervoll
Ladet zum chlättere y – isch das nid toll
Und bisch uf em Dach, was wilsch no meh
Chasch schynz ä Rägeboge gseh

Dr Alpeclub, mir sin informiert
Isch an däre Chlätterwand sehr interessiert
Denn wär in dr Eigernordwand will bestoh
Cha z'Allschwil gratis in ä Chlätterlehrgang goh

Au dr FC Allschwil, hän mir vernoh
Wär um die Chlätterfassade heillos froh
Au wenn ä paar Fussballer jetzt scho wättere
Mit Röhretraining chasch in die erschi Liga chlättere

Au dr Zivilschutz cha die Fassade nutze
Und all Johr sämtlich Röhre putze
D'Unterhaltschöschte hät mä so im Griff
Das isch ä prima Lösig, absolut mit Pfiff

Sogar dr Seniorendienst „zur alte Poscht“
Zeigt Interessä an däm Röhregschtell bigoscht
Zwei Mol in dr Wuche vo nün bis zäh
Git's Altersturne, wie mir dien vernäh

Dr Turnverein lot sich nid lo lumpe

Au är will an dära Fassade ummegumpe
Männer- und Fraueriegi in corporé
Chasch mit Pyramidebilder an däne Röhre gseh

Mit Blauliecht will d'Füürwehr ufchrütze
Sie dien die Röhre aber nit absprütze
Sondern praktisch und nid simmuliert
Zeige wie me Menscherettig dürefiert

Au die beide Kunschtverein, oh jeh minee
Chasch bim Röhrechlätttere gseh
Si wättere gegesitig, s'goht zue ganz hitzig
Hejoh, si hän scho wider ä Lämpesitzig

Mir stelle fescht, die Rägebogechlätterwand
Bietet für d'Dorfverein allerhand
Denn jetzt het Allschwil nach langem Warte
Ändlich ä Rägeboge-Chlättergarte

d'Chrutstorze
Wildviertel-Clique Allschwil